



12. august 2010

UKA 2010/74

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqqummiuppaa:

Utoqqalinersiat pillugit malittarisassat allannortinnissat pillugu apeqquteqaat allaavigalugu oqallinnissamik siunnersuut, taamaasippat utoqqaat utoqqalinersiallit amerlanerit sulisinnaalissammata.

(Inatsisartunut ilaasortaq Niels Thomsen, Demokraatit)

Tungavilersuut:

Tamatta nalunnilarput, inuiaqatigiinni utoqqalisartut amerliartormata. Tamanna ineriartorneruvoq pitsaasoq. Aammali utoqqaat amerliartornerisa ukiualunnguit qaangiuppata inuiaqatigiinnut unamminartunngortussaapput maannagaaq eqqarsaatigilereertariaqakkatsinnik. 1970-miit 2008-mut arnat agguaqatigiisillugu inuusarnerat 65,1 –miit 71,6-mut qaffappoq angutillu 57,4-miit 66,6-mut. Ineriartorneq tamanna ingerlaannartussaavoq siuinissamilu utoqqalinerusalertussaavugut.

Utoqqaat amerliartornerat inuiaqatigiinnut unamminartunngortussaavoq, utoqqalisunik pilersuisat sulisinnaasut peqataanik ikiliartortussaammata. Demokraatini utoqqaat atorluarneqanngitsutut isigaangut. Taamaattumik kissaatigaarput oqallisigissagippat, qanoq iliorutta utoqqaat sivisunerusumik sulisalersissinnaanerlutigit, aammalu qanoq iliorluta soraaminngoreeralualluunniit sulisiinnartarsinnaanerigut.

Inuit qiimanerulernikummata peqqinnerulerlutillu, Demokraatini isumaqarpugut soraarninngornermut killigititaq qaffattariaqartoq. Nunaqqatigut utoqqaat allatut ajornartumik sivisunerusumik sulisalertariaqarput taamaattumik soraarninngorsinnaanngortarnerup killinga nalilersoqqittariaqarparput. Utoqqalinersiat tungaviusumik aningaasartaat kikkut tamarmik pisinnaasariaqarpaat, taakkulu tunniunneqartassapput isertitat allat eqqarsaatiginagit assersuutigalugu aapparisaq isertitai, nammineq soraarnerussutisiassatut katersat imaluunniit sulinikkut nammineq isertittakkat. Utoqqalinersiat tungavisumik aningaasartaat tunniunneqartassapput qanga inunngorsimaneq tungavigalugu allamik naamik.

Utoqqaat, soraarnerussutisiaqalereeraluallutik suliinnartut amerlaneruppata avataaniik sulisussanik tikisitsisarnissamik pisariaqartitsineq minnerulissaaq. Taamaalippat utoqqaat misilittagaasa atorluarnerisa saniatigut inuiaqatigiinni aningaasarsiorneq iluaquserneqassaaq, utoqqaat sulineritik tungavigalugu akileraartarnerat ingerlaannartussaammat.

Taamatut oqarlunga oqallittoqarlularumaartoq kissaatigaara, qilanaarpungalu Naalakkersuisut akissutissaannut kiisalu partiit allat oqaaseqaatissaannut.